

26 FEB 1998

INFOTECH M'SIA/ITX'98 UTK PERKENAL AGENDA IT NEGARA

KUALA LUMPUR, 26 Feb (Bernama) -- Majlis Teknologi Maklumat Negara (NITC) dan Persatuan Industri Komputer Malaysia (PIKOM) akan sekali lagi mengadakan persidangan dan pameran teknologi maklumat (IT) "INFOTECH Malaysia/ITX '98" sebagai usaha untuk mempromosikan agenda IT negara.

Acara selama empat hari itu yang bermula pada 21 April akan diadakan di Pusat Dagangan Dunia Putra (PWTC), kata NITC dalam satu kenyataan hari ini.

Perdana Menteri Datuk Seri Dr Mahathir Mohamad, yang juga pengerusi NITC, dijangka menyampaikan ucaptama pada pelancaran persidangan serta pameran itu.

Persidangan INFOTECH Malaysia, yang diadakan sejak 1995, akan mengumpulkan pembuat keputusan daripada sektor awam, swasta, sektor bukan komersil serta pihak media untuk membincangkan isu-isu nasional serta arah dan haluannya yang berkaitan dengan pembangunan IT negara.

Setiausaha tetap NITC, Tengku Datuk Dr Mohd Azzman Shariffadeen menyifatkan INFOTECH Malaysia sebagai satu "kad laporan" yang menggariskan perkembangan serta kemajuan agenda IT di peringkat negara, negeri dan tempatan.

"Seperti tahun-tahun lalu, persidangan INFOTECH Malaysia yang akan datang akan bertindak sebagai landasan bagi kedua-dua pendukung wawasan tempatan dan antarabangsa menyuarakan pandangan mereka serta mengenalpasti isu-isu utama dan cabaran-cabaran yang terpaksa dihadapi dalam mewajarkan operasi agenda IT negara," katanya.

Persidangan itu juga akan memaparkan kejayaan-kejayaan hasil maklum balas terhadap pembangunan dan pelaksanaan inovasi IT termasuk Aplikasi Demonstrator, katanya.

Persidangan itu dijangka menarik lebih daripada 1,000 peserta.

Bersempena persidangan itu juga, pameran ITX'98 akan diadakan sekali lagi bagi tahun kesembilan. Pameran empat hari itu yang juga bermula 21 April dijangka dapat menarik lebih 40,000 pengunjung. -- BERNAMA

LES ZK MA